

Kommuunit piffinni pinaveersaartitsinermut immikkoortumi anguniagaannut ikorfartuisussanik, Peqqissaanermik Ilinniarfiup ataani pinaveersaartitsinermik siunnersortitut ilinniartitaanermik pilersitsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut
(Inatsisartunut ilasortaqaq Agathe Fontain, Inuit Ataqtigiit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Aappassaaneerneqarnera

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap siunnersuut pillugu sukumiisumik isumaliutissiissuteqarneranut Naalakkersuisut qujassuteqarput. Siunnersuutip siullermeerneqarnerani Naalakkersuisut allannguutissatut siunnersuutaata akuerineqarnissaanik Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliami amerlanerussuteqartut inassuteqarnerannut Naalakkersuisut naammagisimaarinnipput.

Ataatsimiititaliap isumaliutissiissutaani Ataatsimiititaliaq allappoq, ilinniartitaaneq qanoq ittoq pilersinneqartussatut Naalakkersuisunut suliakkiutigineqarnerasoq aalajangiiffigisassatut siunnersuummi allannguutissatullu siunnersuummi ersarluttoq tassanilu 2006/2007-imi pinaveersaartitsinermik siunnersortitut ilinniartitaaneq pineqarnerasoq. Naalakkersuisut erseqqissassavaat pinaveersaartitsinermik siunnersortitut ilinniartitaanerup 2006/2007-imeersup pilersinneqaqqinnissaa pineqanngimmat. Akerlianilli immikkoortut akimorlugit immikkut paasisimasalinnut pinaveersaartitsinernik suliniutit ilisimasat tunngavigalugit qaffasinnerusumik ilinniartitaanertut qaffasissuseqartoq ilinniaqqinneq pineqarpoq. Sulisut ilisimasaasa ilinniartitsinermi ilaatinneqarnissaat Ataatsimiititaliap kaammattuutigaa, pinaveersaartitsinermi suliniutini periutsit sakkussallu inerisarnissaat sulinermilu misilinneqarnissaat tunaartaralugu. Kaammattuut tusaatissatut Naalakkersuisut tiguaat.

Ilinniakkani meeqqat, inersimasut utoqqaallu, peqqinnissamut iluaqutit aammalu najukkami neqeroorutunik atorluaanerit kiisalu pinaveersaartitsinermik suliaqarnermut kajumissuseqarnerulersitsinissat immikkut ukkatarineqarnissaat pissusissamisuussasoq ataatsimiititaliamit oqaatigineqartoq Naalakkersuisut tusaatissatut tiguaat.

Kommunit peqataatinneqartariaqartut, taamaaliornikkullu suleqatigiinnikkut najukkani pinaveersaartitsinermi anguniakkat ilinniakkamit ikorfartorneqarnissaat qulakkeerneqassasut Ataatsimiititaliap uparuarpaat. Soorunalumi Naalakkersuisut taamaasiussapput.

Taamatut oqaaseqarlutik allannguutissatut siunnersuutip akuersissutigineqarnissaa Naalakkersuisut inassutigaaat.